

清儒學案

世章



肆拾

清儒學案卷八十三

天津徐世昌

潛研學案上

當惠戴學說盛行吳皖而潛研崛起婁東於訓詁音韻厤算金石無不淹貫尤邃於史後儒分其一節皆足名家乃兼擅眾長不自矜詡著述宏富闇然日章其德養爲不可及羣從子弟互相砥礪樸學風尙萃於一門可廬慨亭尤深造焉述潛研學案

錢先生大昕

錢大昕字曉徵一字辛楣號竹汀嘉定人年十五御史王峻主紫陽書院聞其才言於巡撫雅爾哈善檄召至院試以周禮文獻通考兩論悉中典要遂留肄業又從元和惠定宇吳江沈冠

雲游研治古經義聲音訓詁之學乾隆十六年高宗南巡召試
賜舉人授內閣中書甲戌成進士改庶吉士散館授編修入直
上書房授皇十二子讀官至詹事府少詹事四十年丁父憂歸
遂不復出厯主鍾山婁東紫陽諸書院在紫陽最久弟子著藉
甚眾嘉慶九年卒年七十有七先生不專治一經而無經不通
不專攻一藝而無藝不精凡訓詁音韻天文輿地典章制度職
官氏族以及古人官爵里居事實莫不錯綜貫串在京師與同
年褚摺升吳樛亭講明算學尙書何國宗年已老聞其善算先
往拜之歎爲不及先生於中西諸法剖析無遺用以觀史自太
初三統四分下迄大衍授時朔望薄蝕凌犯進退強弱皆抉摘
知誤昭若發蒙在館時奉勅與修音韻述微續通志續文獻通
考一統志熱河志天球圖諸書又嗜金石文字同時畢秋帆孫

淵如王蘭泉武虛谷各有記撰而先生熟於歷代地理官制沿革及遼金元國語世繫故考據精密度越諸家常病元史冗襍漏落欲倣范蔚宗歐陽永叔之例因搜羅元人詩文集小說筆說金石碑版別爲編次更定屬草未成而二十二史攷異一百卷尤爲平生精力所萃常日自惠戴之學盛行於世天下學者但治古經略涉三史三史以下茫然不知得謂之通儒乎蓋有爲而作也他著有三史拾遺五卷諸史拾遺五卷修唐書史臣表一卷元史氏族表三卷元史藝文志四卷四史朔閏攷四卷通鑑注辨正二卷洪文惠洪文敏陸放翁王伯厚王弼州年譜各一卷疑年錄四卷金石文跋尾二十卷金石文目錄八卷聲類四卷十駕齋養新錄二十卷餘錄三卷三統術衍三卷鈴一卷風俗通義逸文一卷恆言錄十卷文集五十卷詩集十卷續

集十卷合爲潛研堂全書別刻者唐五代學士年表各一卷宋
中興學士年表一卷鳳墅帖釋文一卷竹汀日記鈔二卷又三
卷又一卷又著有經典文字考異三卷唐石經攷異一卷南北
史雋一卷金石文附識一卷天一閣碑目二卷吳興舊德錄四
卷先德錄四卷日記六十卷詞垣集四卷

參漢學師承記續
疇人傳阮元國史

儒林傳彙王
和撰墓志銘

廿二史攷異自序

予弱冠時好讀乙部書通籍以後尤專斯業自史漢迄金元作
者廿有二家反覆校勘雖寒暑疾疢未嘗少輟偶有所得寫於
別紙丁亥歲乞假歸里稍編次之歲有增益卷帙滋多戊戌設
教鍾山講肄之暇復加討論閒與前人闇合者削而去之或得
於同學啟示亦必標其姓名郭象何法盛之事蓋深恥之也夫

史之難讀久矣司馬溫公撰資治通鑑成惟王勝之借一讀它人讀未盡十紙已欠伸思睡矣況廿二家之書文字煩多義例紛糾輿地則今昔異名僑置殊所職官則沿革迭代冗要逐時欲其條理貫串瞭如指掌良非易事以予傭劣敢云有得但涉獵既久啟悟遂多著之鉛槧賢於博弈云爾且夫史非一家之書實千載之書祛其疑乃能堅其信指其瑕益以見其美拾遺規過匪爲齟齬前人實以開導後學而世之攷古者拾班范之一言擿沈蕭之數簡兼有竹素爛脫豕虎傳譌易斗分作升分更子琳爲惠琳乃出校書之陋本非作者之訾而皆文致小疵目爲大創馳騁筆墨夸耀凡庸予所不能效也更有空疏措大輒以衰貶自任強作聰明妄生痕瘡不叶年代不揆時勢強人以所難行責人以所難受陳義甚高居心過刻予尤不敢效也

桑榆景迫學殖無成惟有實事求是護惜古人之苦心可與海內共白自知槃燭之光必多罅漏所冀有道君子理而董之

文集

答問

問八卦方位何以有先天後天之殊曰說卦傳孔子所作其言曰震東方巽東南離南方乾西北坎正北艮東北唯不見坤兌二方兌爲正秋則必正西方矣坤介於離兌之間亦必位西南矣伏羲畫卦以來蓋已有之伏羲以木德王而傳稱帝出乎震是震東巽東南之位必出於伏羲不當別有方位也漢唐以前儒家與方士均未言先天圖者宋初方士始言之而儒家尊信其說欲取以駕乎文王孔子之上毋乃好奇而誣聖人乎天地水火雷風山澤各自相對本無方位之可言後儒援天地定

位四語傳會先天之說尤爲非是夫天高而尊地下而卑古今不易之位也地勢北高而南下君位北而南面臣位南而北面信如乾南坤北之說上下眞倒甚矣安得云定位乎

問今文尙書本有太誓三篇馬季長言太誓後得按其文若淺露又舉春秋國語孟子孫卿禮記所引五事以疑之至東晉古文出別有太誓三篇唐儒尊信古文遂以今文太誓爲僞若晚出古文未可信則今文太誓轉可信乎曰太誓伏生所傳雖無之然伏所撰大傳有八百諸侯俱至孟津王升舟入水鼓鐘亞觀臺亞將舟亞宗廟亞及白魚入王舟事俱與今文太誓同武帝初董仲舒對策引太誓白魚入于王舟有火復于王屋流爲烏周公曰復哉復哉二十二字可證伏生壁藏百篇之太誓與後得之太誓本無二本以不在伏生日授二十八篇之數故云

後得其實景武之世已有之或謂宣帝本始中河內女子所得者妄也孔安國得壁中古文以考二十九篇得多十六篇所云二十九篇者卽伏生之二十八篇與太誓也史遷嘗從安國問故所載多古文說而周本紀稱武王上祭于畢東觀兵至于盟津爲文王木主載以車中軍武王自稱太子發言奉文王以伐不敢自專乃告司馬司徒司空諸節齊栗信哉予無知以先祖有德臣小子受先功畢立賞罰以定其功遂興師師尙父號曰總爾眾庶與爾舟楫後至者斬武王渡河中流白魚躍入王舟中武王俯取以祭旣渡有火自上復于下至于王屋流爲鳥其色赤其聲魄云是時諸侯不期而會孟津者八百諸侯諸侯皆曰紂可伐矣武王曰女未知天命未可也乃還師歸又齊世家稱武王欲修文王業東伐以觀諸侯集否師行師尙父左杖黃

鉞右把白旄以誓曰蒼兕蒼兕總爾眾庶與爾舟楫後至者斬
遂至盟津諸侯不期而會者八百諸侯諸侯皆曰紂可伐也武
王曰未可遂還師與太公作此太誓此二篇皆采今文太誓之
文齊世家又明云作此太誓然則孔壁中所得安國所傳者卽
此太誓古今文初無二本也許叔重說文序云其稱書孔氏而
引周書王出渰又引孜孜無怠又引師乃指皆在今文太誓篇
然則孔氏古文太誓與今文正同而東晉晚出之古文斷非孔
氏古文也晉有樂安亭侯李長林集注尙書於今文太誓篇每
引孔安國曰知安國嘗爲太誓作傳安國親見壁中古文使果
識其僞必不爲作傳以是知今文太誓之非僞而孔穎達詆爲
僞者妄也書序稱武王作太誓三篇史公周本紀所載武王上
祭于畢云云此太誓上篇也又云居二年武王徧告諸侯曰殷

有重罪不可以不畢伐此太誓中篇也又云十一年十二月戊午師畢渡孟津諸侯咸會曰孳孳無怠武王乃作太誓告于眾庶今殷王紂乃用其婦人之言自絕于天毀壞其三正離遏其王父母弟乃斷棄其先祖之樂乃爲淫聲用變亂正聲怡說婦人故今予發惟共行天罰勉哉夫子不可再不可三此太誓下篇也唐初作疏時今文太誓尙存而疏云上篇觀兵時事中下二篇伐紂時事可證史記所書本于太誓史公旣親見古文則今文太誓之爲眞太誓審矣

問孟子言孔子成春秋而亂臣賊子懼愚嘗疑之將謂當時之亂賊懼乎則趙盾崔杼之倫史臣固已直筆書之不待春秋也將謂後代之亂賊懼乎則春秋以後亂賊仍不絕於史冊吾未見其能懼也孟氏之言毋乃大而夸乎曰孟子固言春秋者天

子之事也述王道以爲後王法防其未然非刺其已然也太史公曰撥亂世反之正莫近乎春秋又曰有國家者不可以不知春秋前有讒而不見後有賊而不知爲人臣子者不可以不知春秋守經事而不知其宜遭變事而不知其權春秋之法行而亂臣賊子無所容其身故曰懼也凡篡殺之事必有其漸聖人隨事爲之杜其漸隱之殺也於鞏帥師戒之子般之弑也於公子慶父帥師伐於餘邱戒之此大夫不得專兵柄之義也尹氏立王子朝在昭公之世而書尹氏卒於隱之策崔杼弑君在襄公之世而書崔氏奔衛於宣之策此卿不得世之義也齊侯使其弟年來聘再見於春秋爲無知之弑君張本也母弟雖親不可使踰其分也趙穿弑君而以趙盾主惡名穿之弑由於盾也可使踰其分也趙盾主惡名穿之弑由於盾也盾甲父與穿同罪盾於甲父則放之於穿不惟不放且使之帥

師侵崇盾尙得辭其罪乎侵崇小事不必書而書之所以正盾之罪且不使穿得漏網也鄭公子宋弑君而以歸生主惡名歸生正卿且嘗帥師敗華元矣力足以制宋而從宋之逆較之趙盾又有甚焉不得託於本無逆謀也楚公子比之弑君棄疾成之而比獨主惡名者奸君位也而棄疾之惡終不可掩故以相殺爲文著其罪同然比與棄疾皆楚靈之弟靈逐比而任棄疾卒死於二人之手先書比奔晉又書棄疾帥師圍蔡明君之舅弟不可以愛憎爲予奪也衛孫甯出其君而以出奔爲文衍有失國之道也貶衍則嫌於獎剽故先書公孫剽來聘以見義公孫而干正統其罪不可掩也楚商臣蔡般之弑子不子父亦不父也許止不嘗藥非大惡而特書弑以明孝子之義非由君有失德故楚蔡之君不書葬而許獨書葬所以責楚蔡二君之不

能正家也楚成之事與晉獻略同子孝則爲申生子不孝則爲
商臣而晉亦尋有奚齊與卓之弑未有家不齊而國治者也故
晉獻之卒亦不書葬也書閹弑吳子餘祭戒人君之近刑人也
書盜弑蔡侯申戒人君之疏大臣而近小人也欒盈之入曲沃
趙鞅之入晉陽書之以戒大都耦國之漸人臣不可專其私邑
也楚子虔弑于乾谿書其地著役之久也君親出師久而不歸
禍之不旋踵宜矣楚之強莫強於虔伐吳執慶封滅賴滅陳滅
蔡史不絕書而無救於弑者無德而有功天所惡也宋襄公用
鄫子楚靈王用蔡世子皆特書之惡其不仁也且以徵二君之
強死非不幸也宋公與夷齊侯光楚子虔以好戰而弑晉侯州
蒲以誅戮大臣而弑經皆先文以見義所以爲有國家者戒至
深切矣左氏傳曰凡弑君稱君君無道也稱臣臣之罪也後儒

多以斯語爲詬病愚謂君誠有道何至於弑遇弑者皆無道之君也其賊之有主名者書名以著臣之罪其微者不書不足書也無主名者亦闕而不書史之慎也非恕臣之罪也聖人修春秋述王道以戒後世俾其君爲有道之君正心修身齊家治國各得其所又何亂臣賊子之有若夫篡弑已成據事而書之良史之職耳非所謂其義則竊取之者也秦漢以後亂賊不絕於史由上之人無以春秋之義見諸行事故爾故惟孟子能知春秋

問周人百畝而徹以方里畫井計之是爲九而取一而孟子云其實什一先儒因有公田二十畝爲廬舍之說然於經無正文何故曰鄭康成注周禮嘗引孟子野九夫而稅一國中什一之文孔穎達詩正義申其旨云周制有貢有助助者九夫而稅一

夫之田貢者什一而貢一夫之穀通之二十夫而稅二夫是爲
什中稅一也九一而助爲九中一知什一自賦非什中一者以
言九一卽云而助明九中一助也國中言什一乃云使自賦是
什一之中使自賦之明非什中一爲賦也孟子又云方里而井
井九百畝其中爲公田八家皆私百畝同養公田公事畢然後
敢治私事所以別野人也言別野人者別野人之法使與國中
不同也爾雅云郊外曰野則野人爲郊外也野人爲郊外則國
中爲郊內也郊內謂之國中者以近國故繫國言之亦可地在
郊內居在國中故也

見甫
田疏

按郊外國中人各受田百畝或九而

取一或什一而取一通外內之率則爲什而取一故曰徹徹之
爲言通也康成之義得孔氏而益明若分公田爲廬舍八家各
二畝半其說始於班固而何休注公羊趙岐注孟子范甯解穀

梁宋均注樂緯皆因之非鄭義也

問許叔重說文解字十四篇九千三百五十三文不見於經典者幾十之四文多而不適於用竊所未喻曰今世所行九經乃漢魏晉儒一家之學叔重生於東京全盛之日諸儒講授師承各別悉能通貫故於經師異文采摭尤備姑卽予所知者言之如瑯卽易確乎其不可拔之確昏卽括囊之括尅卽跛能履之跛捋卽哀多益寡之哀拊卽介于石之介戢卽朋盍簪之簪櫛卽觀我朵頤之朵觀卽虎視眈眈之眈倏卽其欲逐逐之逐酺卽咸其輔頰舌之輔睇卽夷于左股之夷蚍卽婦子嘻嘻之嘻嘻卽其行次且之次

論語造次必於是亦从此

櫛卽繫于金柅之柅𨔵卽漸

進之進孀卽歸妹以須之須菩卽豐其蔀豐卽豐其屋之豐孥

卽極深研幾之研索卽探賾索隱之索履卽天地定位之定

周禮